



SIARAN MEDIA KEMENTERIAN PELANCONGAN, SENI DAN BUDAYA

FESTIVAL KEBUDAYAAN RUMPUN BAJAUSAMA SABAH 2025 MERIAHKAN TUARAN

SABAH, 10 Ogos 2025 | Kementerian Pelancongan, Seni dan Budaya (MOTAC) dengan kerjasama Kerajaan Negeri Sabah dan Persatuan Rumpun Bajausama Sabah telah menganjurkan Festival Kebudayaan Rumpun Bajausama Sabah 2025 (FKRBSS2025) selama empat hari bermula 7 hingga 10 Ogos 2025 di Pusat Kebudayaan Rumpun Bajausama, Kampung Lok Batik, Tuaran, Sabah. Festival yang berlangsung dari 9.00 pagi hingga 11.00 malam setiap hari ini telah dirasmikan oleh Tun Datuk Seri Panglima Haji Musa bin Haji Aman, Tuan Yang Terutama Yang di-Pertua Negeri Sabah dan turut dihadiri oleh YAB Datuk Seri Panglima Haji Hajiji bin Haji Noor, Ketua Menteri Sabah serta YB Datuk Khairul Firdaus Akbar Khan, Timbalan Menteri Pelancongan, Seni dan Budaya Malaysia.

Festival ini bertujuan memelihara, memperkasa dan mempromosikan budaya Rumpun Bajausama yang merupakan sebahagian daripada warisan penting negeri Sabah, di samping memperkukuh perpaduan masyarakat berbilang etnik melalui persembahan seni, muzik, tarian, bahasa, makanan dan permainan tradisional. Edisi 2025 ini lebih istimewa kerana buat pertama kali mendapat kerjasama rasmi MOTAC dan diangkat sebagai antara acara penggerak Tahun Melawat Malaysia 2026 (VM2026).

Antara aktiviti menarik sepanjang festival ialah persembahan kebudayaan tradisional dan moden, tarian dan muzik etnik Bajausama, demonstrasi permainan rakyat, pameran kraftangan, pertandingan busana warisan, bengkel anyaman, ukiran kayu, pembuatan makanan tradisional, konsert mini oleh artis tempatan terkenal serta program Citarasa Warisan@Sabah yang menampilkan lebih 30 jenis makanan

warisan Sabah termasuk Ambuyat, Bosou, Nasi Linopot, Sambal Tuhau, Sagu Borneo dan Kuih Penjaram.

MOTAC turut menegaskan komitmennya membantu penggiat seni dan pelancongan di Sabah khususnya Tuaran melalui Geran Sokongan Sektor Kebudayaan (GSSK) dan Geran Sokongan Sektor Pelancongan (GSSP). Pendekatan ini selaras dengan semangat Malaysia MADANI yang menitikberatkan kelestarian budaya, kesejahteraan ekonomi komuniti serta pemeliharaan nilai warisan untuk generasi akan datang.

Lebih penting, festival ini melibatkan penyertaan aktif komuniti setempat sebagai penari, pemuzik, tukang masak, peniaga, penyelaras bengkel dan pempamer warisan budaya, sekali gus memperkasakan ekonomi tempatan dan menyemai rasa bangga terhadap budaya warisan tempatan. Aspirasi jangka panjang MOTAC adalah menjadikan kebudayaan sebagai aset ekonomi dan diplomasi negara selaras dengan Dasar Kebudayaan Negara (DAKEN) dan aspirasi Malaysia MADANI.

Dikeluarkan oleh:

**Unit Komunikasi Korporat
KEMENTERIAN PELANCONGAN, SENI DAN BUDAYA (MOTAC)**

Tel: 03-8000 8000 Fax: 03-8891 7181

Website: www.motac.gov.my Email: group.ukk@motac.gov.my

Facebook, Instagram, X & TikTok: @mymotac

